

Historia di brug bieu di Balashi



DEN e dianan aki brug bieu di Balashi ta sera pa motibo di trabounan di renovación, algo sumamente necesario despues di 82 aña di uzo intensivo. Prome cu construcion di e brug na 1929, trafico entre ambos parti di nos isla tabata posibel solamente pasando dor di Franse Pas, algo cu normalmente tabata dura casi henter un dia pa motibo di e estado di e caretera (sin asphalt), specialmente durante lunanan di awasero.

Ora Isaac Wagemaker a worde instala como Gezaghebber na fin di 1928, el a cuminsa mensora pa drecha e situacion di e infraestructura, entre otro di e careteranan, tanto na Oranjestad como na otro parti di nos isla.

Na Playa, porco tabatin e costumber di cana rond riba caya di santo. Nassaustra tabata e prome caya cu a worde asphalt y tambe a worde construi acera. Otro caya a sigui, asina tambe un caretera nobo pa parti p'ariba di nos isla, na unda Lago a habri su portanan. A construi un brug riba Spaans Lagoen, loke no tabata un brug sino mas un dam cu tubo den dje pa fluho di awa, cu caretera riba dje. Rib'e potretnan di e aña ey e tubonan ta visibel, algo cu e ultimo decananan no tabata e caso mas.

Na fin di añanan '50 y na 1960, brug riba Spaans Lagoen ya a haya un *face-lift*. Awor e ta wordo reconstrui completamente di nobo, cu un sistema moderno di beton cu ta permiti e fluho liber di awa.